

Heroja

Sł. E. Pryczkowski, muz.

Czãsto lubiã w niebò wzerac,
jãkbëm szukôł radë w nim.
Cëż tu mëslec, co tu dzejac,
jak so radzëc w zëcym swim?

Snôżich gwiondów wòlã pëtac
bë wzac wiedno bëlny krok,
czej sã w jiwrach trzeba retac.
- A tu zôs ju nowi rok.

Ref. Kò z młoda człowiek mô wiedno w głowie
le zmieniac pòdług se.
To nie je letkò, kò doch nié wszëtkò
sã w swiece dzeje zle.

Bò co je bëlné przeńc mùszi wielné
łżë, pòmstwë, zgardë mët -
jak nie ùsadzą tej mòcë dadzą.
Dobëcé przinǳe wnet!

Le bëc wiérny òjców stegnie
naszi mòwie peńnic straż
- niech nen słodczy cãżôr przëgnie,
chòc bë chrzebt miôł bòlec jaż.

Marny są co w ùrmie stoją,
dlô wëchwalë sënë znąd.
Chto sã copnie - nen heroją
i w ti rzëce brnie pòd prąd!

Ref. Kò z młoda człowiek mô wiedno w głowie
le zmieniac pòdług se.
To nie je letkò, kò doch nié wszëtkò
sã w swiece dzeje zle.

Bò co je bëlné przeńc mùszi wielné
łżë, pòmstwë, zgardë mët -
jak nie ùsadzą tej mòcë dadzą.
Dobëcé przinǳe wnet!